

穿窬 謂穴孔穿垣爲盜者。

掏摸 擇便取物曰掏，以手揣物曰摸。

公取 謂不避耳目，公然而取者。

竊取 謂潛形隱面，方便而私取者。

已成盜 謂珠玉寶貝之類已入手隱藏，放逸飛走之屬已專制在己者。

未成盜 謂飛放之屬引之於外，未得專制，木石重器移於本處，而未馱載，俱未成盜。

首從 造謀設意，專於進止，曰首；聽受糾合，同犯非違，曰從。又曰首謂罪首，從謂從坐。

同火 十人曰火。謂相與作過，不以徒黨同異，但犯罪時合爲一火者。

同案 即同起也。謂不以所犯前後有差別，但相連及作一案者。

同黨 相助匿非曰黨。謂曾經和同商量，隨從同黨者。

同謀 謂同設計作過者。

加功 從而助威，共相傷害於人，謂之加功。若雖不下手，當時同共窘迫，以致前人被害者亦是。

停藏 宿止曰停，隱匿曰藏。

窩藏 謂隱匿作過者。《左傳》曰保奸，張敞曰賊囊袋。

知情 本不同謀，唯知所犯，謂之知情。但曾預謀，謂之同情。